



REBOLUSYONARYO A DYARYO TI UMILI ITI AMIANAN-LAUD A LUZON

DANGADANG

Enero-Pebrero 2004

*

Tawen 18 Blg. 1

*

P5.00

*

Ipása no Mabása

FLASH NEWS

18 armas nasamsam ti NPA-Kalinga! *Kitaen iti panid 6.*



GAPU ITI pannakapaay ti reaksyonaryo a gobyerno a lappedan ti panagabante ti rebolusyon, kumarkaro ti terorismo laban kadagiti umili ti Ilocos ken Kordilyera. Iti panangidaulo ti aso-aso a rehimen a Macapagal-Arroyo, umir-irteng dagiti pasista nga atake na kontra kadagiti umili.

Ti panagkaro ti militarisasyon ket mangibungbunga ti awan sarday a pananglabsing kadagiti pangtao a karbengan. Ikonkonsentra ti gobyerno ti

Ranggas Militar iti Ilocos Sur ken Kalinga

Koresponsal manipud iti Kalinga ken 1st ken 2nd district ti Ilocos Sur

LINAON

Ranggas Militar iti Ilocos Sur ken Kalinga	1
TAY-AK TI GUBAT	6
Dangadang a mannalon iti Ilocos Sur, Rumegregta, Pumigpigs	7
Ti Aktibista a Masa, Ubbog ti Rebolusyon	10
Ammoyo Kadi?	12
Ti Maisukat a Sistema ti Gobyerno no Agballigi ti Rebolusyon	13
PANNIRIGAN	17
Dagiti narimat a balligi ti Partido iti Ilocos-Cordillera iti 2003	19
DAMAG KEN ADAL	20-23
PIDBAK	24
SEKSYON KULTURAL	27
MANUEL	28



DANGADANG

Ti **DANGADANG** ket rebolusyonaryo a dyaryo ti umili iti Amianan-Laud a Luzon. Kas dyaryo ti umili, ditoy a maipablaak dagiti kinapudno a laplappedan ken kalkaluban dagiti agturturay a dasig. Ditoy a maammuan tayo dagiti damag ken impormasyon a saan a rumrummuar kadagiti dyaryo, radyo, ken pagiwarnak a kontrol dagiti managgundaway ken manangidadanes a dasig.

Ti **DANGADANG** ket rummuar kada dua a bulan iti tarabay ti Partido Komunista ti Pilipinas. Tapno naan-anay nga agserbi daytoy kas boses ti umili, dawaten mi nga ipatulod yo dagiti damdamag, komentaryo, kanta, iskit, daniw, drowing, ken dadduma pay a kayat yo a maipablaak. Kasta met a silulukat kami iti aniaman a dillaw, obserbasyon, ken singasing.

Pagtitinnulongan tayo a padur-asen ti **DANGADANG**. Ti lima a piso a presyo ti dyaryo tayo ket bassit a boluntaryo a donasyon tapno masuportaen ti agtultuloy a panagruar na.

pasista a ranggas na laban kadagiti sibilyan, lider-masa, ken progresibo nga organisasyon masa. Nakaat-atiddogen ti listaan dagiti krimen ti pasista a militar ken dadduma pay nga armado a grupo ken agtultuloy a manaynayanon.

Panagpaltog ken panagpatay kadagiti sibilyan

Kalpasan ti awan-asi a panagpatay dagiti militar kada Johnny Camareg, Etfew Chadyaas ken Efren Agsayang idia Mountain Province, ninayanon da manen iti maysa pay a kaso ti panagpatay iti maysa nga inosente a sibilyan idia met Kalinga.

Idi Disyembre 7, 2003, ni Victor Balais ket pinatay dagiti elemento ti Alpha Coy, 77th Infantry Battalion ken CAFGU iti panagidaulo ni 2nd Lt. Floyd Gano. Ni Balais ket maysa a mannalon iti Asibanglan, Pinukpuk, Kalinga. Agtawen iti nasurok 40, addaan asawa ken innem nga annak. Iti dayta nga aldaw, nagmalmalem ti 14 soldado ti 77th IB iti purok da Balais. Idi dumanon ti 7:00 PM, sinerrek da Lt. Gano ken dadduma pay a soldado ti balay da Balais bayat a nabati a nagbantay ti uppat iti arubayan. Idi 7:30 PM, bayat nga agkapkape da Lt. Gano, nagsasaruno ti putok ti M16 iti ruar. Idi dinamag ni Lt. Gano kadagiti tao na no ania ti napasamak, simrek iti balay ti maysa a CAFGU ket inted na ti maysa nga M16 a paltog kano ti NPA a naengkwentro da. Ngem kinuna ni Jeron Gumabay, kaanakan ni Victor nga adda met idi iti balay da Balais a saan nga NPA ti makinkukua iti paltog ta mailasin na a daytoy ket paltog ni Victor nga uliteg na.

Dagus nga imbaga ni Lt. Gano iti pamilya ni Balais a saan da a rumrummuar ta amangan no adda pay kakadua ti NPA a naengkwentro da. Kalpasan na ket nagdardaras da a rimmuar, awit da ti paltog ni Balais. Saan a nakagaraw ti pamilya ni Balais nupay idin ket napalalo ti danag da. Agarup 10:00 PM idi nagpilit ti bumarito nga anak ni Balais a mapan na biruken ni ama na. Nasarakan na ni ama na ngem maysan a nalamiis a bangkay. Nakadasay iti paraangan da, nadigos iti bukod na a dara gapu ti 11 a tama ti bala iti nadumaduma a paset ti bagí na. Awanen dagiti berdugo a militar ken CAFGU.

Kabigat na, inakusaran ti militar ni Balais a maysa nga NPA. Inlastog da pay kadagiti umili nga adda ti nawayp-out da a grupo ti NPA idia Asibanglan. Nagiwaras da iti ulbod ken pammadakes a propaganda

kontra iti NPA.

Ngem nairut a sinupiat dagiti umili ti Asibanglan daytoy a kinaulbod. Segun kadagiti umili, ni Balais ket maysa a mannalon nga iti daydi a rabii ket agawiden manipud iti panaganup idi bigla laengen a paltogan dagiti militar. Kinuna pay dagiti residente ti Asibanglan a ti paltog nga awit ni Balais ket usar na iti panaganup ken proteksyon na iti bagí na gapu ta saan pay a narisut ti *tribal war* da iti tribu a Naneng. Ti gubat ket gapu iti panangpatay ti tribu a Naneng iti kabsat na a ni Galanto Balais bayat nga agtrabtrabaho iti talon na idi Enero 2003.

Kalpasan a naitabon ti bangkay ni Balais, immasideg dagiti umili ti Asibanglan kenni Mayor Wilfredo Gudayon, mayor ti Pinukpuk, Kalinga. Kiniddaw da ti hustisya para kenni Victor Balais. Ngem kalpasan a naibaga da ti pudno a napasamak, imbaga laeng ti mayor nga ipa-*blotter* da iti PNP ti napasamak ken isu kanon ti makaammo a makitungtong iti Army.

Naglabas dagiti aldaw ngemawanti panaggarawti hustisya para kenni Balais. Agtultuloy latta ti kinaulbod nga iwarwaras ti 77th IB nga NPA kano ni Balais. Gapu ditoy, napan dagiti umili iti maysa nga istasyon ti radyo idia Tuguegarao. Ditoy da nga imbutaktak ti pudno a napasamak ken kinaberduo dagiti pasista nga AFP.

Iti maysa pay a kaso, idi Disyembre 10, 2003, ni Pallong Cuesta Pot-aw, maysa a mannalon a taga-Mabungtot, Kalinga ket pinaltogan dagiti agop-operasyon a Philippine Army ken CPLA integrees bayat nga agturong isuna iti uma na. Saan a natay ni

Pot-aw ngem grabe ti sugat na gapu ta naputed ti tulang iti takiag na. Nagtarus isuna idia Dagnas, Lubuagan no sadino a tinulongan dagiti umili ken impan da iti ospital. Kabayatan na, pinidut dagiti pasista a soldado dagiti basyo ti bala tapno makaluban ti krimen da.

Gapu ta saan a kabaelan nga agasan ti doktor ti sugat ni Pot-aw, intaray da isuna idia Tabuk. Iti dalan, pinasardeng manen dagiti pasista a militar ti ambulansya a nagluganan na ken inimbestiga da ni Pot-aw. Nabayag a tinaktak dagiti awanan-asi a militar ti panagbiyahe da Pot-aw idinto a makita da ti kasasaad na nga *emergency*.

Dagiti sabali pay a kaso ti panagpatay ket napasamak idi 2003 ken pilit a kalkaluban dagiti pasista a militar:

- Panangpatay da kenni Romeo Siganay idia Malapaaw, Bangued gapu ta sinuspetsa da nga isu ket kameng ti NPA.
- Idia Immayos, San Juan, Ilocos Sur, agama a mannalon ti pinatay ti maysa a soldado ti 50th IB.

Panagallilaw dagiti militar

Nasaknap met dagiti nadumaduma a taktika nga us-usaren ti militar ken polisia tapno allilawen da ti umili ken pagparangen da nga agbalballigi da a mangpamek iti

rebolusyonaryo a tignayan,

Tapno paruaren a maab-abak kano ti NPA, ti ar-aramiden dagiti militar ket akusaran da dagiti sibilyan nga isuda kano ket NPA. Kalpasan na ket pilit a pagsurenderen da dagitoy, paayaban da isuda iti kampo ken pagpirmaen ken litratuen kas nagsurender nga NPA. Nalatak ditoy ti sumagmamano a kaso iti Ilocos Sur. Kas pangarigan, idia Cacadiran, Cabugao, inallilaw ni Sgt. Ud-don ti sumagmamano a residente babaen iti panangimbata kadakuada nga umatendar kano iti kasangay ni Gov. Chavit



Singson. Ngem gayam, iparang ti militar isuda kas *rebel surrenderees* kenni Gloria Macapagal-Aroyo nga amo da. Idiay met Maradudon, Cabugao ken

pay dagiti soldado ti balay ni Colombo Vito Cruz a mannalon idia Malammin bayat nga agparparti isuna ti kalding. Tapno makasida dagiti soldado iti kalding, imbaga da nga adda NPA iti uneg ti balay na uray no awan. Saan gayam nga NPA ti gagara da ta inaribungbongan da ti maparparti a kalding ket sinida da.

“Awan ti sabali a salaknib ti umili no di nga agarmas ken agrebolusyon. No agtatalna nga itulok ti umili dagiti panagabusu ken panaglabsing ti militar kadagiti pangtao a karbengan, ad-adda a tumured da nga agaramid iti dakes.”

Maratudo, Magsinggal, dagiti residente ket pilit a pinagpirma dagiti soldado.

Idiay met Kalinga, idi laeng 2003, inawis ken pinilit dagiti pasista a militar ti innem a kabataan nga agsurender kas NPA. Kalpasan na, inorderan ti militar dagitoy nga umasideg ken agespiya kadagiti NPA. Imbaga pay ti militar nga alaen da ti talek dagiti NPA tapno makaala kadagiti taktikal nga impormasyon ken no kabaelan da ket takawen da dagiti armas ti NPA. Binutbuteng dagiti militar dagiti kabataan a no saan da nga umannugot ket agparang iti listaan ti PNP nga isuda ket NPA. Uray dagiti babbaket ken ubbing ket al-allukoyen dagiti militar babaen iti panangited iti kuarta ken makan tapno makaala ti uray ania nga impormasyon maipanggep iti NPA.

Pammutbuteng ken panagabusu kadagiti umili

Dagiti dadduma pay a kaso ti panaglabsing ti AFP-PNP-CAFGU kadagiti pangtao a karbengan ket panagbugbog, panagtakaw, panagdadael iti sanikua ti umili, arbitraryo a panagpaputok iti paltog, iligal a panagaresto ken panagibalud, panangipupok iti bartolina, arbitraryo nga akusasyon kadagiti masa nga isuda ket sumupsuporta iti wenno kameng ti NPA, kdpay.

Iti Ilocos Sur, sumagmamano kadagiti nalatak a kaso ket dagiti sumaganad:

Bgy Malammin, San Juan. Saan a namnaminsan a daras a kinubkob dagiti soldado ti balay dagiti mannalon a da Billy Villalon ken agkabsat a Ferdinand ken Francin Ramos. Nagkampo dagiti soldado iti abay dagiti balay da. Gapu ditoy, inkapilitan a pinanawan dagiti mannalon ti balbalay ken talon da. Kinubkob

Barbar, San Juan. Kanayon ti panagharas dagiti agop-operasyon a soldado kadagiti mannalon nga agratrabaho ditoy. Pinagsasaoan da ti maysa a mannalon nga agis-isprey kadagiti mula na a nateng. “Apay nga is-ispreyam dayta nateng? Kayat mon sa met a masabidongan kami!” kuna ti sodado. Ngamin, ranta dagiti soldado

nga agkikil wenno agtakaw ti nateng. Ni met Tony Erese, maysa pay a mannalon ket sinuspetsa dagiti soldado a mapmapan kadagiti NPA idi naminsan a nagiwayway isuna ti kalding. Impagarup ngata dagiti militar a mapan ited ni Erese ti kalding kadagiti NPA. Dagiti balbalay iti sitio Sarmiento ken Kaventuraan ket panapanawen a kubkob dagiti pasista a militar gapu iti panagsuspetsa a pagnanaedan dagiti NPA dagitoy a balay.

Brgy Cacadiran, Cabugao. Nagpatpatnag a nagpaputok ti paltog ken grenade launchers dagiti elemento ti Recon Platoon 50th IB iti panangidaulo ni Sgt Danciang idi Disyembre 10, 2002.

Sapang ken Suagayan, Sta Lucia. Iti nagsaruno a barangay miting nga inangay ti RSOT (Reengineered Special Operations Team) iti Brgy Sapang idi Enero 25, 2004 ken iti Brgy Suagayan idi Pebrero 1, 2004, pilit a pagpudpudnuen ken arbitraryo nga inakusaran ti militar dagiti residente nga isuda ket simpatisador ken mangpakpakan iti NPA. Pilit pay nga inimestiga dagiti militar ti sumagmamano a lider-masa. Ipilpilit ti militar kadagiti barangay council ti dua a baryo nga agideklara iti curfew ngem kinontra dagiti barangay council daytoy.

Pila East, Sta Lucia. Idi Pebrero 1, 2004, ni Maricel Andaya ket kinumpronta ken pilit a nagdamag dagiti elemento ti 5th ID RSOT Coy iti panangidaulo ni 2Lt Uguis ken 2Lt Zinampan no sadino ti ayan ken no ania ti trabaho ti kasadar ken gayyem na. Suspetsa ti RSOT a ti gayyem na ket nagmiembro iti NPA.

Conconig East, Sta Lucia. Idi parbangon ti Setyembre 28, 2003, ni Augusto Acosta ket tinutokan ken binutbuteng dagiti elemento ti 50th IB idi masabat

DANGADANG

da isuna iti dalan. Ti pasamak ket inreport ni Acosta iti barangay council a dagus met a nagreport iti munisipyo.

Matibuey, San Emilio. Idi Setyembre 2003, iti operasyon ti Charlie Coy, 50th IB iti panagidaulo ni 2Lt Macarilay, inakusaran ken pilit a pagpudpudnuen dagiti militar ti maysa a mannalon nga isuna kano ket kuryer wenno “pasa-bilis” ti NPA. Binutbuteng ken winarningan da a biraen da isuna no itultuloy na ti kasta a trabaho.

Candon City, Sta Lucia, Galimuyod. Idi October 2003 ken January 27, 2004, nagisayangkat ti 50th IB ti nagsasaruno a *symposium* iti uppatt a National High School. Babaen kadagiti kinaulbod ken pammadakes kontra iti NPA, pinadas ti militar nga allukoyen dagiti titser ken estudyante a sumuporta iti kontra-insurhensya. Al-allukoyen ni Maj. Valerio dagiti titser ken estudyante nga agserbi kas espiya. Nangited pay ti militar ti numero ti *cellphone* a mabalin kano a panangipasaan ti impormasyon maipanggep iti NPA.

Baracbac ken Abaya, Galimuyod. Nakigtot dagiti ubbing idi bigla a simangpet ti maysa a Platoon ti Charlie Coy ti 50th IB. Inayaban ken sinaludsod da dagiti ubbing no sadino ti ayan ti NPA. Kasdiay met ti inaramid da kadagiti ubbing iti baryo Abaya, Galimuyod.


Banaue, Ifugao. Ni Ben Himmiwat ket awan gapu a binugbog dagiti nabartek a soldado ti 77th IB iti uneg ti maysa a Karaoke Bar.

Awan ti naaramidan dagiti sibilyan gapu ta nakatutok ti paltog dagiti soldado. Nakaro pay ti panagabuso da kadagiti babbai iti Banaue. Dagiti serbidora kadagiti panganan ken pagiinum ket basta lattan bisongen, arakupen, ken ramasen dagiti militar ti suso da. No agawid da, paltog ti ipayapay da a mangpara iti tricycle. No adda ti nakalugan iti tricycle ket pilit da a padissaagen. Saan da pay nga agbayad iti plete.

Sadino ti Hustisya?

Galad ti mersenaryo wenno mabaybayadan a soldado ti panagusar

iti armas kas pangtangsit, pangkikil, pangkarit, ken pangpatay iti uray siasino. Saan nga umili no di ket agturturay a dasig ken bulok a sistema ti pagserserbian da. Aniaman ti aramiden da a propaganda, panagpabanglo, panagpammarang, panangallukoy, ken panaginsisingpet ket saan nga umanay a mangkalub iti agruprupsa a bangsit ken kinadakes da. Sigurado a mapáay ti aniaman a gandat da a maala ti puso ken panunot ti umili. Imbes ket pungtot ken laban ti umili ti apiten da.

Awan ti sabali a salaknib ti umili no di ti agarmas ket agrebolusyon. No agtatalna nga itulok ti umili dagiti panagabuso ken panaglabsing ti militar kadagiti pangtao a karbengan, ad-adda a tumured da nga agaramid iti dakes. Daytoy ti kayat ti militar. Ngem no lumaban ti umili, ken agtitimpuyog a lumaban, mabaelan tayo a gun-oden ti nadumaduma a tukad ti balligi kas iti panangpatakias kadagiti soldado ken detachment iti baryo, panagkedked iti panagrekut da iti CAFGU ken espiya, panangisardeng kadagiti operasyon, panangidarum kadagiti aglablabsing a soldado, kdpay. Ti naan-anáy nga hustisya ket magunod babaen iti rebolusyon. Iti sango ti nagkaykaysa nga umili, agtigerger dagiti militar iti buteng. Aglalo no adda ti NPA a mangsangpet iti agbegbeggang nga espada ti hustisya, a naidarang iti agap-apuy a pungtot ti maidaddadanes nga umili. 





18 armas nasamsam ti LCC

ADDA 17 NGA M14 ken maysa a Garand a nasamsam ti Lejo Cawilan Command (NPA-Kalinga) iti reyd iti maysa a detatsment ti 77th IB iti Limos, Pinukpuk, Kalinga idi agsapa ti Pebrero 6. Maysa a bassit a platun ti NPA ti

nagisayangkat iti reyd. Iti umuna a putok, nasugatan ti dua a CAFGU. Iti uneg laeng ti sangapulo a minutos ket natengngelen dagiti Nalabaga a mannakigubat ti intero a detatsment. Iti napalalo a kigtot, nagsitataray dagiti CAFGU ken Army a saan a limmaban gapu

iti sorpresa nga atake. Pinuoran dagiti Nalabaga a mannakigubat ti kampo ti CAFGU sakbay nga immatras da. Malaksid kadagiti nangato a kalibre a paltog, nakaala pay ti NPA ti 26 magasin ken 1,319 bala ti M14, 81 bala ti Garand, ken dadduma pay a ramit militar. ✎



RSOT rinaut ti ACC

RINEYD ti maysa a yunit ti Alfredo Cesar Command (NPA-Ilocos Sur) ti nagkampuan ti *Reengineered Special Operations Team* (RSOT) iti baet ti Barangay Hall ken Day Care Center idia Quibitquibit, Sinait, Ilocos Sur idi Pebrero 16, 2004. Natay ni Sgt. Agustin Tucpi a tim lider ti RSOT, ken nasugatan da Cpl. Hector Manuel ken Cpl. Orlando Calamayan. Daytoy a reyd ket sungbat ti NPA iti kumarkaro nga abuso militar idia Ilocos Sur. ✎

BKO naimballigian a naisayangkat

DAGITI BARO A rusing ken dagiti siguden a kadre militar manipud iti nadumaduma a larangan a gerilya iti rehiyon ti nagsasabat iti maysa a sona a gerilya tapno isayangkat ti Batayan a Kurso ti Opisyal (BKO) idi Oktubre-Nobyembre 2003. Tinungtong da dagiti galad ken responsibilidad dagiti opisyal ti NPA.

Inadal da ti kabuklan nga estratehiya ken ti

partikularidad ti panangiyabante ti gubat ti umili iti pagilian, dagiti addang agturong iti panangpadur-as ti larangan a gerilya iti aspeto a politiko-militar, ti panagidaulo ken administrasyon iti yunit ti NPA, ken dagiti taktika ken teknika iti panagiwayat ti gubat ti umili. Babaen iti daytoy a panagsanay, ad-adda a mapadur-as ti praktika ti pannakigubat a gerilya ken maiyabante ti naunday a gubat ti umili. ✎

Dangadang dagiti mannalon iti Ilocos, Rumegregta, Pumigpigs

NUMAN PAY NARIKUT ken adu ti sikko na, tuloy-tuloy ti buelo ti dangadang para iti agraryo a rebolusyon. Nakagun-od manen dagiti mannalon iti Ilocos Sur kadagiti balligi iti anti-pyudal a pannakidangadang ken para iti pangkagimongan a pagsayaatan da kontra iti reaksyonaryo a gobyerno, dakkel a komprador burgesya, ken apo't daga.

Tulbek iti pananggun-od kadagitoy a balligi ket ti agtultuloy a panangpatibker kadagiti rebolusyonaryo nga organisasyon masa babaen iti nairut a silpo ti teorya ken praktika, adal ken kapadasan, panunot ken aramid, ken ti awan-sarday a siklo ti panagplano-panangipatungpal-panagtasa.

Panangipababa iti ábang iti daga

Iti napalabas a tawen 2003, kinompronta ken nakitungtong dagiti mannalon iti tallo nga apo't daga iti nadumaduma a lugar tapno maipababa ti ábang iti daga.

- Iti umuna a kaso, ti kadawyan ket 75-25 ti bingayan iti irik ngem iti panawen ti panagmula ti tabako ket postor (fixed rent) ti sistema ti ábang - P6,000 ti maysa nga ektarya. Nakitungtong ti 15 a makitaltalon iti nga apo't daga. Nagkedked ti apo't daga ken adda inikkat na a tallo a makitaltalon. Inrupir dagiti mannalon ti kiddaw



da inggana immannugot ti apo't daga iti kiddaw a 50% a panangipababa ti ábang. Dagiti met naikkat a makitaltalon ket naisubli.

- Iti sabali met a lugar, immannugot iti 50% a pannakaipababa ti ábang ti maysa nga apo't daga idi immay nagbakasyon ditoy manipud abrod. Ngem idi nagsubli iti US, sabali met ti kuna ti katalek ti apo't daga. Awan kano ti kasdiay a tulagan. Inrupir dagiti mannalon ti kiddaw da inggana nakombinse ti katalek. Nagbenepisyo ti 14 a pamilya.
- Iti maikatlo a kaso, ti dati a 75-25 a bingayan iti tabako ket kayat ti apo't daga nga agbalin a postor, ngem rumbeng nga agbayad dagiti mannalon sakbay nga agmula. Iti kastoy a sistema ad-adda

a malugi dagiti mannalon isu a nagprotesta da. Naipagballigi ti 52 makitaltalon kakuyog dagiti pamilya da nga agtalinaed a 75-25 ti bingayan.

Dagitoy a balligi ket nagun-od babaen iti nairut a panagtittinnulong ti umili ken tarabay ti Partido ken NPA. No awan ti urnos ti umili, no awan ti armado a bileg ti soldados da nga NPA, sigurado nga awan pulos ti ited ti apo't daga kadagiti kiddaw ti umili. Makita ditoy ti napateg ken di mapagsina a papel ti armado a pannakidangadang ken agraryo a rebolusyon.

Panangsupiat iti usura

Adda met tallo a nalatak a balligi ti panangpunas iti usura.

- Dimmarup dagiti mannalon iti bodega ti maysa a komersyante-usurero. Nagpetisyon da a maipababa ti interes ti pautang. Nangayab ti usurero iti pulis ngem gapu iti palawag dagiti mannalon iti pulis maipanggep iti petisyon ket nakombinse a nagpirma pay ti pulis iti nasao a petisyon kas suporta iti ilablaban dagiti mannalon. Namindua a daras ti pannakisango dagiti mannalon kakuyog dagiti kaalyado da a “koboy” wenno *buyert* ti tabako sakbay a naimballigian a naipababa ti interes ti pautang agingga iti 0% ken iti prinsipal nga utang laengen ti mabayadan. Uray dagiti kabarbaro a nakautang ket saan na a pinagbayad iti interes.
- Iti sabalipay a lugar, napalalo ken saan a nainkalintegan ti interes a singsingiren ti maysa nga usurero kadagiti marigrigat a mannalon. Manipud iti prinsipal nga utang dagiti mannalon a P1,000 laeng, dimmakkel daytoy iti P40,000. Gapu ta saan a makabayad dagiti mannalon, indarum ti usurero dagiti mannalon

iti korte. Inyuman dagiti mannalon ti problema da kadagiti kakadua nga NPA ken nagplano da ti umannatup nga addang. Nakitungtong dagiti mannalon ken timmulong ti kakadua a nanglawlawag iti usurero. Gapu ditoy, naibabawi ti kaso iti korte ken naipagballigi a ti prinsipal nga utang laengen ti mabayadan.

- Gapu pay iti dangadang ti umili, naipababa met ti presyo ti abono, pestisidyo, ken dadduma pay a lako ti dua nga apo't daga. No ania ti presyo iti pagtagilakuan, isu ti nasurot. Naipababa met iti 27% manipud iti 60% ti panagsingir ti maysa pay nga usurero iti pairikan iti maysa a baryo. Dagitoy a balligi ket nakaawis iti kabangibang a baryo tapno agpaorganisa kadagiti NPA.

Makita ditoy no kasano nga agsisinnilpo ti tallo a trabaho ti rebolusyon iti kaaw-awayan: bayat a pumigpiga ti agraryo a rebolusyon, lumawlaw met ti maorganisa a masa ken rebolusyonaryo a

base. Iti panaglawa ti base, pumigpiga met ti armado a dangadang, kasta met ti bileg ti umili a mangiyabante iti agraryo a rebolusyon. Rumbeng a balansyado ti panagkukumpas dagitoy tallo a trabaho. No mabaybay-an ti maysa, saan nga umabante ti dadduma.



“Gapu iti agtultuloy a panagtignay ti organisado a mannalon, nagunggon da ti NTA, dadakkel a korporasyon ti sigarilyo, ken Trading Centers.”

Panangilaban iti umno a presyo ti tabako

Nasuroken a 300 tawen ti pannakagundaway dagiti mannalon ti tabako iti Ilocos manipud pay tawen 1700s. Ti bunga ti pagbambannogan da ket agtultuloy a laklak-amen ti sumagmamano laeng a buklis nga apo't daga ken komprador burgesya. Ngem manipud simmaknap ti baro a nailian-demokratiko a rebolusyon iti Ilocos ken narugian ti panagorganisa ken panagtignay dagiti mannalon, in-inut a makagun-od da ti benepisyo.

DANGADANG

“Presyo ti produkto a tabako, ingato!” ti kiddaw dagiti mannalon. Iti tawen 2001, nagun-od da ti nayon a P10 iti P38 tunggal kilo a tabako. Tawen 2002 ket dimmanon iti P58/kilo, bayat a kadagiti lugar a naur-urnos ken napigpigs a ti tignayan a masa ket dimmanon iti P64/kilo.

Ngem medyo nagbaliw ti angin idi 2003. Gapu iti agtultuloy a panagtignay ti organisado a mannalon, nagunggon da ti NTA, dadakkel a korporasyon ti sigarilyo, ken Trading Centers. Iti amak a mapukaw ti likliksaben da a super-ganansya, nakapanunot da ti baro a taktika tapno ibagsak ti presyo ti tabako. Insaknap da idi 2003 ti manangallilaw a panagklasipika iti tabako kas salty (naapgad). Manipud iti makalawas laeng a kangatuan a nadanon ti presyo a P58/kilo ti Class AA iti sumagmamano a lugar ken P16.38 inggana P20.26 ti kababaan a reject, nagbalin a P20-26/kilo ti Class AA ken P4/kilo ti reject gapu ta kuna da a “salty” (kitaen ti Setyembre-Oktubre nga isyu ti *Dangadang*). Dakdakkell manen ti maganansya dagiti bukli manipud iti nakalaklaka a presyo ti lokal a tabako. Ipampannakkel da ti imported a tabako a nalaklaka ken napimpintas ti kalidad na.

Gapu dito, agpeggad a mapukaw ti panagmula ti tabako kas kangrunaan a pagbiagan ti mannalon iti Ilocos. Iti kastoy a kasasaad, rumbeng a saan nga agsardeng nga agtignay dagiti mannalon a labanan, suksoken, ken ibutaktak daytoy nakalawlawag a baro a taktika dagiti bukli.

Panangkiddaw kadagiti serbisyo a pampubliko

Maysa pay a paset ti agraryo a rebolusyon ti panangkiddaw kadagiti serbisyo a pampubliko nga ipapaidam ken kurkurakoten ti gobyerno.

- Nagkiddaw dagiti umili iti paset ti Galimuyod ken Del Pilar ti serbisyo iti salun-at ken sanitasyon kas kadagiti agas, usar ti medikal, ken *water system*. Namindua a daras ti panagtignay dagiti umili sakbay nga immannugot ti Municipal Health Office ken Committee on Health iti Sangguniang Bayan. Iti agdama ket binulan a maik-ikkan da kadagiti agas kas iti antibiotics, paracetamol, *first aid kit*, agas para kadagiti ubbing ken dadduma



“Pammaneknek dagitoy a ti kangrunaan nga ilablaban ti rebolusyon ket ti pagsayaatan ken pagimbagan ti kaaduan - dagiti mannalon.”

pay. Daytoy a balligi ket nagbalin a pagwadan dagiti kabangibang a baryo a nagkiddaw met iti kapada a serbisyo manipud iti gobyerno.

- Saan a naggunay ti National Irrigation Administration (NIA) idi naperdi ti irigasyon a mangpadpadanum iti nasurok 200 ektarya iti dua nga ili. Nagpetisyon dagiti mannalon tapno simpaen ti NIA ti naperdi nga irigasyon. Naaprobaran ti kiddaw da ken naited ti pondo a P1 milyon manipud iti badyet ti Sangguniang Bayan. Dagiti mannalon ti nagtrabaho iti pannakaisimpa ti irigasyon ken naileppas idi napan a tawen. Maysa pay, kiniddaw dagiti mannalon a ti tinawen a baybayadan da a P900 tunggal ektarya kas Irrigation fee ket rumbeng a tengngelen ti organisasyon dagiti mannalon imbes nga alaen ti NIA. Usaren laengen ti organisasyon da ti pondo a pangmentina no adda manen madadael a paset ti irigasyon. Nagballigi daytoy a kiddaw da.

Panagabante ti Agraryo a Rebolusyon

Nabaknang dagiti adal manipud kadagitoy a dangadang dagiti mannalon, malaksid pay kadagiti kongkreto a benepisyo a nagun-od da. Pammaneknek dagitoy a ti kangrunaan nga ilablaban ti rebolusyon ket ti pagsayaatan ken pagimbagan ti kaaduan - dagiti mannalon.

Tapno naan-anáy a maiyabante ti agraryo a rebolusyon iti maksimum, nasken a laglagipen tayo no sadino ti rumbeng a pangiturongan iti panagorganisa kadagiti umili, panagbukel iti base, ken amin a trabaho tayo iti agdama a tukad ti gubat ti umili - awan sabali no di ti panangagaw iti politikal a bileg babaen iti armado a rebolusyon. Daytoy ti agtaltalinaed a sentral a rebbengen tayo amin itatta. ✚

Ti Aktibista a Masa, Ubbog ti Rebolusyon

Koresponsal
manipud iti Kalinga

KAS ITI PAGAY a maluom iti init, ti aktibista a masa ket tumaud ken tumubo iti darang ti tignayan ken dangadang a masa.

Ti maysa nga aktibista ket mangidadaulo babaen iti nabara a panagserbi. Silulukat isuna iti panagdidinillaw ken panagdillaw-iti-bagi, ken iti panangilinteg kadagiti kamali. Saan nga agpatingga iti sao, ipakita na iti praktika ken disiplina nga isuna ket pagwadan. Addaan bukod a “gasolina” - nagaget, naregta, ken napnuan inisyatiba. Dagitoy ti galad ti maysa nga aktibista. Dagiti met abante nga aktibista ket addaan nabaknang a kapadasan ken naun-uneg a pannakaawat kadagiti prinsipyo ti rebolusyon.

Kongkreto a pakabayaan ti kapadasan ti tallo nga aktibista a masa iti maysa a baryo iti Kalinga a nakaibangonan ti Komite a Pangorganisa iti Baryo (KPB). Ti panagdur-as da kas lider-mannalon ti gapu ken bunga ti panagdur-as ti rebolusyonaryo a tignayan iti baryo. Ni Berting, maysa kadagiti mangidadaulo iti rebolusyonaryo nga organisasyon masa iti baryo ket napanday iti nabaknang a kapadasan iti panagtignay ken natibker nga agserserbi iti rebolusyon. Ni Selya a naangaw ken managistorya ket maysa kadagiti lider-kababaihan iti baryo nga addaan iti pangmedikal a kasanayan. Ni Ato a naulimek ken managbabain idi ket maysa kadagiti lider-kabataan ita a napnuan tured ken regta a tumakder ken sumango iti adu a masa, agsao man wenno agpabuya. Babaen kadagiti sungbat da kadagiti sumarsaruno a saludsod, makita ti dinalan ti kapadasan ken panagdur-as da kas aktibista iti baryo ken kas lider iti sektor a nakapauneg na da.

Dangadang: Manipud idi naorganisa kayo, kasano a napanday kayo kas aktibista?

Berting: Kangrunaan ket babaen kadagiti innadal nga



inted ti kakadua nga NPA. Nakatulong met ti aktibo a partisipasyon ko iti panag-SI (*social investigation*), panagamiris iti dasig, panangisayangkat kadagiti kampanya ken mobilisasyon ti masa, tapno masanay iti pannakilangen ken mapauneg ti pannakaammok kadagiti kakailian. Babaen kadagitoy, napatadem iti kabaalak nga agorganisa ken napadur-as ti panagpataray ko kadagiti miting ken innadal. Kanayonak met nga agbása ken agrebyuak kadagiti rebolusyonaryo a dokumento tapno mapalagipan.

Selya: Dakkel ti naitulong dagiti kakadua kaniak babaen iti nalaing a pannarabay da. Kadagiti innadal, no adda man saan ko a maawatan, saanak a mabain nga agsaludsod kaniada. Dagiti seminar kasilpo iti salun-at man wenno isyu iti pagilian ket nakatulong tapno manaynayonan ti kaammuk. Maragsakanak ta kabaalakon a mangted ti innadal itatta.

Ato: Adu ti maad-adal ko iti *Dangadang* ken *Ang Bayan* no kasano a nauneg nga amirisen dagiti kasasaad ken mapaspasamak iti Kordilyera ken iti pagilian. Nayon a nangpauneg iti kapanunotak dagiti diskusyon kadagiti kakadua ken innadal nga it-ited

da gapu ta kanayon nga agsaludsodak tunggal adda ti saan ko a maawatan. Dagitoy ti nangarmas kaniak tapno adda met ti maibingay ko a punto no tiempo ti tungtongan kadagiti kailian. Isu nga in-inut met a maik-ikkat ti panagbabain ken panagul-ulimek ko.

Dangadang: Kas maysa nga aktibista, ania dagiti parikut a nasabat yo iti panagorganisa ken ania dagiti inaramid yo nga addang tapno marisut dagitoy?

Berting: Problema mi idi no kasano a mapunas dagiti sakit a ligalismo, NGOismo, ken ekonomismo iti kapanunotan ti masa. Narigatan kami no kasano nga ipalawag ti agraryo a rebolusyon ken ti armado a pannakilaban kas kangrunaan a porma ti pannakidangadang. Inadal ken nagpakalaing kami iti duaan a taktika tapno makatakuat kadagiti baro a pamuspusan iti panagorganisa. Naimaksimisa dagiti tradisyonal nga organisasyon iti baryo para iti nadumaduma a porma ti panagmobilisa. Itatta ket in-inut a mapunpunas dagiti nasao a sakit ken dumurdur-as ti programa tayo para iti agraryo a rebolusyon.

Selya: Gapu iti panagbaybay-a ti gobyerno iti edukasyon, adu nga umili ti nababa ti literasiya da. Iti panagorganisa mi kadagiti kababaihan, narigatan dagiti babbaket nga agbása ken agsurat. Isu a nagbirok kami kadagiti simple, nalag-an ngem nabagas a wagas ti panagisuro tapno nalaka da a maawatan dagiti maipalpalawag. Epektibo met dagiti kultural a wagas iti napardas a panagorganisa gapu kadagiti makaawis ken napnuan adal a kankanta, daniw, ken dadduma pay. Tapno marimbawan ti limitasyon iti panagbása, naiwayat ti programa a literasiya iti baryo a naregta nga at-atendaran ti adu a babbaket. Ngimmato ti talek da iti kabaelan da gapu ta nalain da itan nga agbása ken agsurat.

Ato: Adda sumagmamano a masa a numan pay maawatan da ti rebolusyon ket agduadua da nga agtignay. Mamati da kadagiti kakadua nga NPA, ngem no dakami nga aktibista ti mangted ti innadal ket saan da nga agatendar! Numan pay kasta, saan kami a naupay. Naanus latta nga aw-awisen ken kuykuyogen mi isuda kadagiti mobilisasyon ken aktibidad tapno direkta ti panagsubaybay mi iti praktika da. Inggana nagun-od ti talek ken panagbigbig da kadakami kas kadua ken lider-aktibista.

Dangadang: Kas lider iti baryo, kasano a sangsanguen yo dagiti partikular nga interes ti sektor a nakapaunegan yo?

Berting: Tapno maiwayat dagiti naregta a kampanya ti mannalon, tulbek ti nalawa a propaganda-edukasyon. Babaen kadagiti mabasbása, seminar, nainsigudan a kultura, ken nadumaduma a mapagparnuay a pamuspusan ket maipasaknap ti rebolusyonaryo a linya ken takder kasilpo kadagiti isu ti mannalon kas iti globalisasyon ken militarisasyon. Maysa a dakkel a nagun-od ti umili ti pananglapped iti pannakaitakder ti detatsment ti kabusor iti baryo. Idi nangayab ti miting ti militar ken CPLA, impakita ti umili ti tured iti panagsungbat ken panagsupiat da iti plano ti militar nga isubli ti detatsment iti ili. Nagballigi ti umili.

Selya: Iti agdama, idadauluan mi nga aktibista a kababaihan ti kampanya kontra iti sugal, panagbartek ken panaglako iti arak iti baryo. Mapatpatignay ti dadduma pay a kababaihan ditoy.

Ato: Kadakami a kabataan, naregta a maiwaywayat ti kampanya para iti panagsampa iti NPA, aglalo ta nalawag a makitkita nga awan ti maganab iti bulok a sistema ti edukasyon. Ad-adu ken napatpateg pay ketdi ti maadal iti rebolusyonaryo nga eskuelaan. Tumultulong kami iti panagiwaras iti Dangadang, panagsiput iti kabusor, panangipasa iti impormasyon kadagiti kakadua, kdpay. Dakkel a suporta daytoy iti armado a pannakidangadang.

Dangadang: Iti panagserbi iti umili, adu dagiti trabaho ken rebbengen a masangsango. Kasano ti panagbalanse yo iti panawen para iti pamilya ken para iti rebolusyon?

Berting: Saan a nagsina ken saan a rumbeng a




pagbangaen dagiti rebbengen iti rebolusyon ken pamilya no di ket agsinnuporta ken agtinnulong koma. Kayat ko a saoen, no dumur-as ti trabaho iti rebolusyon, aglalo ta adda ti agraryo a rebolusyon nga irusrussuat mi, lumag-an ken dumur-as met ti produksyon ken pangkabiagan ti pamilya. Masapul a maipakaawat daytoy iti pamilya tapno maawatan da ken aktibo nga agtitinnulong ti amin a miembro nga agtignay para iti rebolusyon.

Ato: Awan pay ti asawak isu a saan ko a problema dayta. Ngem ti makunak ket rumbeng nga adda ti nasayaat a panagbibinningay ken pagtitinnulong kadagiti trabaho tapno saan a madagsenan ti maymaysa.

Selya: No adda ti maiskedyul nga innadal wenno miting, simpaen min no kasano a sanguen dagiti dadduma a trabaho iti balay wenno iti talon sakbay ti naikeddeng nga iskedyul tapno saan nga agginnyod

iti oras dagiti masapul a sanguen a trabaho. Babaen iti nasimpa a panagiskedyul ken panagbadyet ti oras, awan ti masayang a kanito.

Iti maudi a saludsod kasilpo iti plano ken pangmabayagan a perspektiba, maymaysa ti sungbat da: ti panangited ti amin a panawen para iti rebolusyon. Para iti tuloy-tuloy a panagduras ti panagorganisa, makita da a kasapulan nga adda dagiti aktibista a masa a pultaym nga agtignay tapno napardas ken komprehensibo a masango dagiti kiddaw ti umad-adu ken dumagdagasen a trabaho kas iti panagorganisa, panagpalawag ken panagiwaras kadagiti mabasbasa, panagadal, sosyo-ekonomiko a trabaho, aksyon masa, suporta iti NPA, kdp.

Kas iti pagay a mangted pangkabiagan, dagiti aktibista a masa ti mangbiag ken mangparegta iti rebolusyon. Agserbi da nga ubbog para iti panangitultuloy iti rebolusyon. 



- Ti PTC ket buwis a singiren ti rebolusyonaryo a gobyerno manipud kadagiti kandidato iti eleksyon. Ti gatad ti masingir ket nakabasar iti pang-ekonomya a kabaelan ti kandidato. Mause daytoy para kadagiti aktibidad ken proyekto ti rebolusyonaryo a gobyerno a makatulong kadagiti umili aglalo kadagiti marigrigat a mannalon.
- Agserbi ti PTC kas *safe conduct pass* ti kandidato ken dagiti kampanyador na a sumrek kadagiti teritoryo ti rebolusyonaryo a gobyerno ti umili ken NPA.
- Mapalubosan dagiti addaan PTC a mangidek ket kadagiti poster, mangiwaras kadagiti campaign materials ken mangisayangkat kadagiti miting de avance iti saklaw a lugar.
- Ti maisyuan ti PTC ket indibidwal a kandidato, saan a ti intero a partido politikal wenno koalision a nakaibilangan na. Ti PTC ti maysa a kandidato ket saan a mabalin nga usaren ti sabali a kandidato (*non-transferable*).
- Maited daytoy kadagiti politiko a saan a kontra-rebolusyonaryo ken awan ti nadagsen a da krimen iti umili. Dagiti napeklan a kontra-rebolusyonaryo a politiko ket saan a maikkan ti PTC ken maparitan a sumrek kadagiti base ti rebolusyonaryo a gobyerno.
- Dagiti maikkan ti PTC ket saan na kayat a saoen a suporta ti rebolusyonaryo a tignayan ti kandidatura da.
- Ti PTC ket saan a pamalubos para iti panagawit iti armas ken saan a pamalubos nga agaramid kadagiti kontra-rebolusyonaryo a kriminal nga aktibidad iti uneg dagiti erya ti rebolusyonaryo a gobyerno ti umili ken NPA. Aniaman a panaglabsing ditoy ket basaran para iti pannakawaswas ti bileg ti naited kadakuada a PTC.
- Ti PTC ket saan a mause kas *safe conduct pass* ti AFP, PNP, CAGU ken dadduma pay a pueras ti militar, paramilitar, ken espiya, kasta met dagiti ramit da.
- Ti PTC ket pirmado ni Martin Montana, tagapagsarita ti Chadli Molintas Command, ken ti lokal a tagapagsarita wenno komander ti NPA kadagiti probinsya.
- Ti bileg ti PTC ket agibus iti maudi nga aldaw ti panagbilang kadagiti butos.

Ti Maisukat a Sistema ti Gobyerno no Agballigi ti Rebolusyon



(maika-2 iti 3 artikulo)

KURAKOT DITOY, kurakot idiay, kurakot iti amin a suli. Napalalo ti kinabulok ti agdama a sistema ti gobyerno. Ti reaksyonaryo a gobyerno ket maus-usar a pagbaknangan dagiti siguden a baknang a dasig a komprador burgesya ken apo't daga. No agparang da iti publiko, kunam la no sinno da a nakadaldalus. Ngem iti likudan ti nakapuspukol a rupa ken nasam-it nga isem da ket ti awanan bain a panagtakaw da iti kinabaknang a parpartuaten dagiti dasig nga anak ling-et.

No agballigi ti rebolusyon, ti bulok nga estado ken sistema ti gobyerno ket saan a simple a sublaten laeng ti umili. No sumublat laeng ti umili, agtalinaed ti bulok a sistema. Ti reaksyonaryo nga estado ket kasapulan a marebba gapu ta napnuan daytoy iti kinabulok. Dagiti daan nga istruktura, makinarya, sistema, korte, baludan, amin nga ahensya ti gobyerno ken uray dagiti linteg ket kasapulan nga interamente a masukatan.


Arig na a maysa a balay a narukop ken matumtumba ti agdama a gobyerno. Saan a mabalin a no agballigi ti rebolusyon ket isu latta a balay ti

pagnaedan ti pamilya. Masapul a marakrak dayta a balay ken maibangon ti baro.

Apaman nga agballigi ti rebolusyon, adu pay laeng dagiti tedda ti daan a sistema. Nauneg a nairamut dagiti sakit a patawid na. Kasapulan ti atiddog a proseso ti rebolusyonaryo nga edukasyon ken kultura tapno mapunas dagiti daan ken bulok a kapanunotan kas iti sistema a dinastiya, padrino, elitismo, burukratismo, kronyismo, oportunismo, repormismo, warlordismo, indibidwalismo, kdpay.

Maysa pay, adda latta ti dakkell a peggad nga agsubli manen iti turay dagiti managgundaway ken manangidadanes a dasig ti komprador burgesya ken apo't daga. Numan pay mapaksyat dagiti kabusor, dagiti nabatbati a pueras da ket nalimed to nga agbandat kontra iti rebolusyon, agiwaras iti intriga, agpammadakes. Sigurado a kakuyog da dagiti imperyalista a mangpadas a mangsabotahe ken mangdiskaril kadagiti balligi ti rebolusyon.

Ngarud, kasapulan ti agtultuloy a dangadang iti amin a tay-ak - iti politika, ekonomya, militar, ken kultura. Ti panangibangon iti baro a gobyerno ket



Iti maisukat a sistema, dagiti mangidadaulo a komite ket agtrabaho a komite, saan a “sao-sao a komite.”

narigat, saan a nalaka. Mabayag, saan nga apagbiit. Kasapulan tayo ti tarabay ti pinaka-abante a teorya iti lubong – ti Marxismo-Leninsmo-Maoismo (MLM), ken dagiti adal iti kapadasan dagiti immuna a nagballigi a proletaryo a rebolusyon.

Porma ken galad ti gobyerno

Apaman nga agballigi ti rebolusyon, maiproklama ti Demokratiko a Republika ti Umili iti Pilipinas. Ti politikal a bileg ket maagaw manipud kadagiti managgundaway ken manangidadanes a dasig, ken maipaima kadagiti demokratiko a dasig ti umili iti panangidaulo ti proletaryo a Partido.

Ti porma ti gobyerno ket demokratiko a koalision wenno nagkaykaysa a prente - panagtitipon dagiti pannakabagi ti amin a patriyotiko, progresibo, ken demokratiko a dasig, sektor, partido politikal, ken grupo ti umili kas iti mangmangged, mannalon, kabataan, kababaihan, propesyonal, kdp. Maisigurado ti pannakabigbig ti karbengan iti bukod a panangngeddeng dagiti nailian a minorya ti Kordilyera, Bangsa Moro, ken Lumad babaen iti autonomiya. Ti estado ken simbaan ket mapagsina. Maibangon dagiti konggreso ken konseho ti umili iti tukad ti baryo, munisipyo, distrito, probinsya, ken nasyonal.

Masirmata tayo ti maibangon a sistema ti gobyerno manipud iti kapadasan ti Komuna ti Paris a kaunaan a naibangon a sosyalista a republika iti lubong idi 1871. Amin a sangay ken posision iti gobyerno ket maibutos - administratibo, opisyalas iti korte, ken eskuelaan. Ken mabalin a maikkat dagiti opisyalas iti aniaman a kanito nga agaramid da ti linuluko. Amin a tukad, manipud ngato inggana baba, ket masuelduan a kapada ti sueldo dagiti mangmangged. Kabalikad ti daan a sistema, awan ti espesyal a benepisyo dagiti nangato

nga opisyalas.

Iti kasta, saan nga agpabaknang ti panggep dagiti tumaray iti eleksyon, no di ket ti pudno a panagserbi iti umili. Maysa pay, dakkel ti matipid a pondo ti

gobyerno, saan a kas iti agdama a masaysayang ti nakadakkkel a pondo a likliksaben dagiti opisyalas para iti sueldo, sabali pay ti makurakot da.

Saan a mapalubosan dagiti sigud a komprador burgesia ken apo't daga iti aniaman a posision iti gobyerno. Dagiti inar-aramid da a dakes ken kontra-umili a linlinteg ket mawaswas. Dagiti dadduma pay a linteg ket in-inut a masukatan kadagiti linteg a mangitandudo kadagiti karbengan ti umili aglalo dagiti dasig nga anak ling-et.

Iti kapadasan ti USSR ken China, dagiti kabusor a dasig ket nakasubli iti turay gapu ta saan a napetpetan prinsipyo ti diktadura ti proletaryado. Isu't gapu a napasubli ti kapitalismo ken nadiskaril ti sosyalismo kadagitoy a pagilian (1953 idia USSR, 1976 idia China). Nagsubli ti bulok a sistema ti turay kadagitoy a pagilian. Napateg la unay nga adal kadatayo ti kapadasan da tapno maliklikan tayo ti kamali a dinalan da.

Tapno maliklikan ti negatibo a kapadasan ti USSR ken China, rumbeng a mapetpetan ti prinsipyo ti diktadura ti proletaryado babaen iti Partido. Daytoy a diktadura ket bileg ti umili a maipakat kontra kadagiti

Burges a demokrasya	Sosyalista a demokrasya
Burukratismo ken anarkiya	Demokratiko a sentralismo
Wayawaya ti imperyalista a manggundaway iti pagilian tayo	Nailian a wayawaya kontra iti imperyalismo
Wayawaya dagiti komprador burgesia ken apo't daga a manggundaway ken mangidadanes kadagiti umili	Wayawaya ti umili kontra iti naindasigan a panangidadanes ken panaggundaway dagiti komprador burgesia ken apo't daga
Wayawaya ti estado a mangidiktat kadagiti kontra-umili a programa, linteg, ken patakaran	Bigbigen ti estado dagiti indibidwal a wayawaya ti umili, maibilang ti karbengan a kumalaban iti bulok a gobyerno.

DANGADANG

sigud a komprador burgesya ken apo't daga tapno saan da a makasubli iti turay. Dagiti kabusor a dasig ti madiktaran, saan a dagiti umili. Iti agdama a sistema, ti basbassit a grupo ket agdikdiktar kadagiti kaaduan. Iti maisukat a sistema, ti kaaduan wenno mayorya ti umili ket agdiktar kadagiti basbassit a grupo dagiti komprador burgesya ken apo't daga.

Iti baro a sistema, sagrapen ti umili ti sosyalista a demokrasya, kasukat ti burges a demokrasya, kas makita iti sumaganad:

Makita ditoy a bogus ti demokrasya ti burges ken pudpudno ti demokrasya iti sosyalismo. Iti bulok a sistema, ti indibidwal a wayawaya ti umili ket agpatingga laeng iti panagbutos no sino ti agturay a mangidadanes ken manggundaway kadakuada.

Iti nadumaduma a tukad ken ahensya ti gobyerno, masurot ti “patakaran a 3/3” – $\frac{1}{3}$ ti Partido, $\frac{1}{3}$ kadagiti masa, ken $\frac{1}{3}$ para kadagiti akintengnga a puersa. Kas pangarigan, no 12 ti miembros ti Konseho ti Barangay, uppat ti aggapu iti Partido, uppat ti aggapu iti rebolusyonaryo nga organisasyon ti masa, ken uppat ti aggapu kadagiti propesyonal ken tradisyonal a lider. Iti kasta, awan ti maymaysa a grupo a mangbukbukod iti panagdesisyon.

Wagas ti panangidaulo

Iti organisasyon ti gobyerno, masurot ti prinsipyo ti demokratiko a sentralismo. Kayat na a saoen,

demokrasya a tartarabayan ti sentralisado a panangidaulo, ken panangidaulo a nakabasar iti demokratiko a partisipasyon ti umili.

Iti politika, dagiti opisyal ti gobyerno ket sumurot iti prinsipyo ti linya a masa ken naindasigan a linya. Kayat na a saoen, demokratiko ti panangidaulo da. Ipatungpal da ti pagayatan dagiti masa, aglalo ti dasig a mangmanged ken mannalon.

Tapno maisigurado ti demokratiko a panangidaulo, dagiti opisyaales ti Partido ken estado ket nairut a sumilpo ken makipaset iti kolektibo a trabaho ti umili. Saan nga agtugtugaw laeng iti opisina ti aramiden dagiti opisyal. Saan a deba-debate laeng nga awanan serbi kas iti ar-aramiden dagiti opisyaales ti agdama a bulok a gobyerno. Imbes, masurot ti sistema a komite iti amin a tukad (baryo inggana nasyonal) no sadino a kolektibo ti panangidaulo. Amin nga umili ket maaddaan ti kolektibo nga isu't pagdalanen ti direkta ken aktibo a partisipasyon da iti panaggobyerno. Daytoy ket panangbiag iti sarita a “ti gobyerno ket ti umili.”

Iti agdama a bulok a sistema, nagsisina ken independyente ti tallo a sanga ti gobyerno (ehekutibo, lehislatura, ken korte) tapno maliklikan kano ti panagabuso. Iti aktwal, nagpapada a kurakot ken agkukumplot dagitoy - ti serbisyo da ket gatangen dagiti kababaknangan a tattao.

Iti maisukat a sistema, dagiti mangidadaulo a

**“ Atiddog pay ti
daliasaten ti rebolusyon
sakbay a magun-od ti
balligi. Nupay kasta, iti
agdama ket nairugin
a maimulmula dagiti
bin-i ti maisukat a
rebolusyonaryo a
sistema ti gobyerno. ”**



komite ket agtrabaho a komite, saan a “sao-sao a komite.” Agserbi da kas lehislatura ken ehikutibo. Kayat na a saoen, ti obraen da ket saan laeng a panagpanday iti linteg, no di isuda mismo ti mangitrabaho ti pannakaipatungpal dagiti linteg. Kolektibo da nga agdesisyon ken kolektibo da a sumungbat kadagiti umili a nangibutos kadakuada.

Masurot ti sistema ti panagdidinnillaw ken panagdillaw-iti-bagi (CSC) tapno maitudo ken mailinteg dagiti kamali ken pagkapuyan. Awan pagdanagan ti umili nga agdillaw kadagiti opisyaes ti Partido ken gobyerno. Dagiti opisyaes ket maiparit a mang-abuso iti bileg ken posisyon da.

Dagiti aglabsing ket dumalan iti nainkalinteg a proseso ti panagusig. Iti kasta, ti target ket mailimita ken maisirig kadagiti talaga a kontra-rebolusyonaryo ken maliklikan ti abuso. Dagiti napaneknekan a naglabsing ket maikkan ti umannatup nga aksyon pangdisiplina. Dagiti saan nga agilinteg ket maikkat. Dagiti kontra-rebolusyonaryo ket mapaksyat. Iti bangir na, dagiti napudno nga opisyal ket madayaw, dagiti managpakumbaba ket mabigbig.

Iti tukad nasyonal, ti panagserbi dagiti opisyal ket mailimita iti dua laeng a termino a saglilima a tawen. Mabalin da nga agretiro iti edad a 65, ken obligado da nga agretiro iti edad a 70. Dagiti nagretiro ket mabalin nga agserbi kas kameng dagiti konseho ti adviser, la ketdi nasalun-at ken kabaelan da pay.

Atiddog pay ti daliasaten ti rebolusyon sakbay a magun-od ti balligi. Nupay kasta, iti agdama ket nairugin a maimulmula dagiti bin-i ti maisukat a rebolusyonaryo a sistema ti gobyerno. Babaen kadagiti organo ti demokratiko a bileg pampolitika kas iti Komite a Pang-organisa ken Rebolusyonaryo a Komite iti baryo agpangato, mapampanday ti kabaelan ti umili nga ipraktika ti baro a sistema, ken sagsagrapien da ti pudno a demokrasya, panagtitinnulong, ken panagdur-as. Dagiti rebolusyonaryo nga opisyaes

	Reaksyonaryo a gobyerno	Rebolusyonaryo a gobyerno
Agturay a dasig	komprador burgesya ken apo't daga	nagkaykaysa a prente dagiti demokratiko a dasig nga idadauloan ti mangmangged
Gandat dagiti opisyal	mausar ti posisyon tapno agpabaknang	mausar ti posisyon tapno agserbi kadagiti umili
Batayan ti eleksyon	popularidad, kinabaknang, kinnabagian, padrino	rekord iti ideolohiya, politika, ken organisasyon
Galad dagiti opisyal	arogante, napangas, managdiktat	demokratiko a panangidaulo, managpakumbaba, silulukat iti dillaw, agilinteg iti kamali
Sueldo dagiti opisyal	nangato	kapatas ti sweldo dagiti mangmangged
Demokrasya	Bogus ken manangallilaw	Adda demokrasya iti politika, ekonomya, ken militar. Masurot ti demokratiko a sentralismo

iti baryo, kasta met dagiti opisyal ti Hukbo ken Partido, ket agtrabtrabaho saan a para iti bukod da nga interes, no di ket para iti pagimbagan ti umili. Saan da nga apo nga agtugtugaw iti bukot ti umili, no di ket kaabay da ti umili nga agibangbangon iti baro a sistema. ✎

.....

Para iti naun-uneg a panagadal, basaen dagiti sumaganad a nagbasaran daytoy nga artikulo:

- “Makasaysayang mga Aral ng Diktadura ng Proletaryado” (1964), *Rebolusyon*, Pebrero 1994.
- Armando Liwanag: “Tumakder Para iti Sosyalismo Kontra iti Moderno a Rebisyonismo,” 1992.
- Programa ti National Democratic Front, 1990.
- Karl Marx: *The Civil War in France*, 1871.
- Vladimir Lenin: *The State and Revolution*, 1917.
- Programa para iti Demokratiko a Rebolusyon ti Umili, 1991 borador ti Komite Sentral.
- Tarabay iti Panangitakder iti Demokratiko a Gobyerno ti Umili.



PANNIRIGAN



Pakaammo: *Siraragsak ti **DANGADANG** a mangipakaammo a manipud iti daytoy nga isyu, panapanawen a rummuar ti kolum a “Pannirigan” babaen kenni **Simon “Ka Filiw” Naogsan**, tagapagsarita ti Cordillera Peoples’ Democratic Front (CPDF). Iti daytoy nga isyu, iyam-ammo tayo ni Ka Filiw.*

TI TAGAPAG SARITA TI CPDF SIMON “KA FILIW” NAOGSAN

NI ENGR. SIMON “KAFILIW” NAOGSAN ket naggapu iti dasig a petiburges ken iti sektor a nailian a minorya. Naiyanak idi Hunyo 28, 1954 idia y Natonin, Mountain Province. Mannalon ti nagtaudan na a pamilya. Naki-asawa iti maysa a nars, addaan dan iti tallo nga annak ken dua nga appoko.

Agtawen laeng isuna ti 15 idi 1969 ken agis-iskuela iti high school idi mamulat iti pudno a kasasaad ti pagilian. Daytoy ket babaen kadagiti palawag ken aksyon masa nga insayangkat ti Samahang Demokratiko ng Kabataan (SDK).

Idi 1971, maysa isuna kadagiti nagatendar iti umuna a konggreso ti Kilusang Kabataan ng Kordilyera idia y Bontoc. Ditoy a nasabat na dagiti adu nga agtutubo nga aktibista iti Kordilyera a pakaibilangan ni Jennifer “Ka Maria” Cariño. Ditoy a napauneg ti kamulatan ni Ka Filiw ken nagmiembro iti rebolusyonaryo nga organisasyon dagiti estudyante.

Idi indeklara ti diktadura nga US-Marcos ti Martial Law idi 1972, nagbalin a narigat ti panagorganisa iti intar dagiti estudyante gapu iti napalalo a panangliplipit ken panagespiya ti militar. Ngem saan a naupay ni Ka Filiw ken dagiti kakadua na. Narimbawan da ti nalipit a kasasaad babaen iti mapagparnuay a wagas kas iti panagmiting bayat nga agbangbangka idia y Burnham Park, panangipasa iti atas bayat nga ag-jogging, kdpy. Adda pay naminsan

a kasapulan nga agmiting da iti adayo a lugar ngem awan ti pagplete da. Gapu ta adda kadua da a nalaing nga agay-ayam iti *chess*, napan da nakipusta idia y Baguio market. Nangabak da isu a naaddaan da ti pagplete a mapan agmiting.

Idi 1974, nagbalin a kandidato a kameng ti Partido. Kadagitoy a panawen, nairut ti kasasaad iti seguridad. Nupay kasta, naregta nga impatungpal na dagiti trabaho a naited kenkuana kas iti pangkagimongan a panagsukisok, panagpropaganda, panagkalap iti materyal a suporta para iti NPA, kdpy. Idi met laeng 1974, natiliw isuna kalpasan a nagisaysayangkat iti Operasyon Dikit ken panagiwaras iti polyetos. Naibalud iti maysa nga aldaw ken maysa a rabii. Gapu ditoy, inikkat ti Saint Louis University isuna iti eskulaan. Immakar iti sabali nga eskulaan ken nagtultuloy a nagtignay iti intar dagiti Igorot nga estudyante. Kadagitoy met laeng a panawen a nagadal isuna iti karate ken nagbalin a miembro ti Japan Karate Association.

Nagturpos ni Ka Filiw iti kolehiyo idi 1977 iti kurso a Bachelor of Science in Civil Engineering. Kalpasan na, nagtrabaho kas private surveyor assistant idi 1977. Idi 1978, simrek kas empleyado ti reaksyonaryo a gobyerno. Idi damo ket iti National Irrigation Administration (NIA) Mountain Province. Immakar iti Department of Public Works and Highways (DPWH) Mountain Province idi 1979 ken nagtalinaed sadiay inggana 1981. Immakar

**“Iti uneg ti NPA a napanday ni
Ka Filiw iti rigat ken sakripisyo
kas maysa a rebolusyonaryo.
Natib-ker a sinango na dagiti
nasabat na a problema kas iti
bigla a pannakaiyadayo na iti
pamilya.”**



manen iti Comission on Audit - Region 1 office idia La Union idi 1981 ken nagtrabaho ditoy nga ahensya inggana 1985. Iti las-ud ti walo a tawen iti uneg ti burukrasya ti reaksyonaryo a gobyerno, nasaksian na ti amin a klase ken wagas ti panagkurakot dagiti opisiales ti gobyerno. Nadismaya isuna iti napalalo unay a kinaruker ken kinabulok ti sistema. Gapu ditoy, immikkat isuna iti gobyerno.

Idi Hulyo 1985, nagserbi kas Executive Director ti Montañosa Research & Development Center, maysa nga NGO a tumultulong kadagiti komunidad ken umili ti Mountain Province ken kabangibang a probinsya. Kagiddan na, nagserbi iti People's Welfare Commission ti Cordillera Peoples Alliance agingga 1987. Nakita na a dakdakkal ti maitulong na kadagiti umili babaen ditoy kumpara iti panagtrabaho iti reaksyonaryo a gobyerno. Idi 1987, maysa isuna kadagiti nangibangon iti Partido Kordilyera, maysa a progresibo a partido iti uneg ti Partido ng Bayan. Babaen daytoy a partido, nagtaray isuna a para congressman ti Mountain Province. Ngem naabak isuna gapu iti reaksyonaryo a sistema ti eleksyon.

Nabukel ti Cordillera People's Tribunal (Korte ti Umili ti Kordilyera) idi 1988 tapno mangkaso ken mangusig ti kinaranggas ti CPLA kadagiti umili ti Kordilyera. Daytoy a panawen ti kairtengan ti terorismo ti aguuyong a CPLA. Adu nga inosente a lider masa ken umili ti pinatay da kas kada Daniel Ngayaan, Romy Gardo, kdp. Maysa ni Ka Filiw kadagiti kameng ti hurado iti Peoples Tribunal. Napaneknekan daytoy a korte dagiti krimen ti CPLA ken ti rehimen nga US-Aquino.

Gapu ditoy ket tinarget ti militar ken CPLA a patayen isuna. Ngem saan a nakalapped iti panagtignay na ti pangta iti biag na. Nakita na a kasapulanen nga agtungpal iti panawagan ti Partido para iti kangatuan a tukad ti dangadang - ti armado a dangadang - no sadino a magun-od ti pudno nga hustisya ken wayawayakontra iti panangidadanes ti reaksyonaryo a turay. Idi met laeng 1988, simmampa isuna iti New People's Army iti edad a 34.

Nagtignay isuna iti Mountain Province ken paset ti Benguet.

Natibker a sinango na dagiti nasabat na a problema kas iti bigla a pannakaiyadayo na iti pamilya. Nalasatan ken narimbawan na dagiti problema idi panawen ti disorientasyon.

Iti agdama, agtultuloy ti naanus ken naregget a panagakemnakadagiti trabahoken rebbengenti Partido ken NPA. Kaykayat na nga agisuro ti kanta kadagiti ubbing. Kumuykuyog iti trabaho a produksyon kas iti panaganup. Naanus nga agpalawag iti programa ken patakaran ti Partido ken NPA kadagiti masa ken kakadua. Aktibo a makitungtong kadagiti lallakay ti tribu wenno ili. Tumultulong iti panagrisut kadagiti kontradiksyon iti intar dagiti tribu.

Nadutokan isuna a tagapagsarita ti CPDF idi Abril 2003. Kas tagapagsarita, paset ti rebbengen na ti panagiruar kadagiti pablaak ti CPDF maipanggep kadagiti isyu, problema, ken dangadang dagiti nailian a minority iti Kordilyera. 🇵🇭



Press Conference da Ka Roger ken Ka Filiw idia Mt. Province.

Dagiti narimat a balligi ti Partido iti Ilocos-Cordillera iti 2003

Naadaw manipud iti Pablaak

ti Komite a Tagapagpaganap ti Ilocos-Cordillera para iti maika-35 Anibersaryo ti Partido

Tallopulo ket lima a tawenen a wakwaknitan ti Partido Komunista ti Pilipinas ti dalan ti pannakasubbot ti umili a Pilipino manipud iti nabayagen a panangidadanes ken panaggundaway ti dasig nga apo't daga, dakkel a komprador burgesya, ken imperyalismo nga US. Narimat dagiti balligi ti rebolusyon a Pilipino iti naglabas a 35 tawen mainayon ti napalabas a tawen.

Lallalo pay a limmawa dagiti larangan a gerilya iti rehiyon ken madama a mabukbukel dagiti baro. Dimmakkel met dagiti pueras ken pormasyon ti NPA ken rumegregta dagiti taktikal nga opensiba a mangipangpangato iti moral ti masa, mangipalpalakam ti napipigsa a danog ken demoralisasyon iti kabusor, ken mangpatpataud ti nayon nga armas para iti NPA ken masa. Naingato ti tukad ti kasanayan dagiti opisyal ken kameng ti NPA iti panangiyabante iti pannakigubat a gerilya. Nasurok doble ti dimmakkelan ti organisado ken impluwensyado a masa manipud 2001. Ti pokus ti panagorganisa dagiti yunit ti Partido ken NPA ket agturturongen iti tukad ti GSM (ganap a timpuyog ti masa) ken panangpaadu iti organo ti bileg pampolitika, bayat nga agtultuloy a lumawlaw a ken umad-adu dagiti grupo ken komite a pangorganisa.

Amin dagiti larangan ket nakagun-od ti nayon ken baro a benepisyo para iti adu a masa babaen iti panangiyabante kadagiti kontra-pyudal a pannakidangadang kas iti panangipababa ti ábang iti daga, panangipangato iti tangdan dagiti mangmangged-talon, ken panangipangato iti presyo ti produkto ti masa. Naiyabante dagiti baro a porma ti panagtignay tapno magun-od dagiti pagsayaatan a sosyo-ekonomiko kadagiti baryo, aglalo iti paset ti Ilocos. Nagtultuloy ti panangikagumaan ti NPA aglalo iti paset ti Mountain Province ken Kalinga tapno bumallaet kadagiti tribu nga agbibinnusor ken iturong ti pannakarisut dagitoy babaen iti nainkappiaan a wagas. Maiyab-abante itatta dagiti pang-ekonomya a kiddaw ti umili ken pumigpigs a ti panagtignay ken suporta da iti armado a pannakidangadang.

Ti rebolusyonaryo a tignayan a masa iti syudad ket tuloy-tuloy a nangibutaktak kadagiti kinabulok iti uneg ken ruar ti gobyerno. Ginunggon da ti rehimen babaen iti nagsasaruno a protesta ken tignay masa a kontra-imperyalista, kontra-pyudal, ken kontra-pasista. Limmawa ti saklaw ti panagorganisa ken panagpatignay, saan laeng nga iti intar ti batayan a sektor ti mangmangged,

mannalon, kabataan-estudyante, ken nakurapay iti syudad, no di ket pati iti umad-adu a sektor ti akintengnga a pueras - titser, empleyado ti gobyerno, tao ti simbaan, mangngagas, ken uray abogado. Adu ti naipagballigi a laban dagiti mangmangged no sadino a nalatak ti balligi iti welga iti Lepanto Mines. Naisilpo daytoy iti lumawlaw a pannakidangadang dagiti mannalon kadagiti igid ti Abra river nga apektado iti polusyon ti minas. Agsubsubli ti regta dagiti lallakay kadagiti tribu ti Kordilyera iti panagbukel iti timpuyog da para iti panagsalaknib iti daga, biag, ken natural a kinabaknang ti daga nga aneutral, ken panangitandudo iti progresibo a pamuspusan ti pannakarisut dagiti kontradiksyon iti tribu.

Agtultuloy ti kontribusyon ti rebolusyonaryo a tignayan a masa iti urban iti armado a pannakidangadang. Nakaited da ti nayon a kadre ken pueras iti kaaw-awayan tapno agakem kas NPA. Nakaited da met ti suporta a materyal ken politikal aglalo iti panangiwaragawag ken panangibutaktak kadagiti isyu ti masa iti sona a gerilya, panangsupiat iti panaglabsing kadagiti pangtao a karbengan, ken panaglaban iti militarisasyon.

Iti panagserrek ti Partido iti maika-36 a tawen, innem a rebbengen ti indatag ti Komiteng Tagapagpaganap ti Rehiyon tapno ad-adda pay a maingato ti tukad ti rebolusyonaryo a pannakidangadang, umas-asideg iti naan-anay a balligi:

- lallalo pay a panagpapigsa ti Partido iti ideolohiya, politika, ken organisasyon;
- panangiyabante iti kontra-imperyalista, kontra-pyudal, ken kontra-pasista a pannakidangadang iti nangatngato a tukad
- panagpapigsa ti panangidaulo iti NPA, panangipangato iti kabaalan dagiti opisyal ken kameng ti NPA iti pannakigubat, panangpairteng iti pannakigubat a gerilya, ken panangpaay iti kampanya a kontra-insurhensya/RSOT ti kabusor;
- panagpapigsa iti pundasyon ti nagkaykaysa a prente;
- panagawis iti ad-adu pay a bilang ti akintengnga a pueras a tumipon iti rebolusyonaryo a pannakidangadang iti syudad ken kaaw-awayan; ken
- panagtulong iti kontra-imperyalista a nagkaykaysa a prente iti lubong laban iti dominasyon, panagidadanes, ken panaggundaway ti US ken dadduma pay nga imperyalista a pagilian, ken panagtulong iti panagpalawa ken panagpapigsa ti sangalubongan a sosyalista a rebolusyon.




Ekspansyon ti LCMC, sinupiat ti umili

DINARUP dagiti umili ti baran-gay Sapid ti opisina ti Department of Environment and Natural Resources (**DENR**) idiay Manila idi Disyembre 16, 2003 tapno direkta nga idanon kenni DENR Secretary Elisea Gozun ti panagsupiat da iti operasyon ken ekspansyon ti Lepanto Consolidated Min-

ing Company (**LCMC**) iti ili da. Insubmitar da ti petisyon kontra iti daytoy a plano ti LCMC.

Dagiti lugar nga apektado iti Victoria II ekspansyon ti LCMC ket ti Buguias ken Mankayan, Benguet; Quirino, Ilocos Sur; ken Tadian, Mt. Province.

I n s a -

ngo dagiti umili dagiti dakes nga epekto ti operasyon ti LCMC iti pagbiagan ken aglawlaw da. Kangrunaan ditoy ti dislokasyon dagiti umili, pannakaperdi ken pannakaawan ti pangal-alaaan da ti pagbiagan, pannakaibus ken pannakaperdi ti natural a kinabaknang aglalo ti danum gapu iti agtultuloy a panagibelleng ti LCMC iti rugit iti Buaki Creek, panaglennek ken panagrenngat ti daga idiay Poblacion, Colalo, Suyoc, ken Sapid, ken ti nakaro a polusyon kas iti angot nga iparparuar ti minas. 



Abusado a patakaran ti LCMC, sinupiat ti LEU

SINUPIAT dagiti mangmangged a kameng ti Lepanto Employees Union (**LEU**) dagiti saan a nainkalintegan a patakaran ti Lepanto Consolidated Mining Company (**LCMC**).

Umuna ditoy ti arbitrario a panagaresto kadagiti mangmangged ken panangidarum kadakuada iti *high grading* (panagtakaw iti balitok) uray pay awan ti naan-anay nga ebiden-sya.

Kuna da, ti panagaresto ket rumbeng a nakabasar iti aktwal a pannakatiliw iti akto ken saan a gapu iti suspetsa laeng. Adda 15 mangmangged nga inaresto ken indarum ti LCMC ti *high grading*. Ibalud ti LCMC dagiti maaresto ken pagbayaden na ida ti pyansa para iti temporario a pannakawayawaya. Masansan nga ar-aramiden daytoy

ti LCMC iti bulan ti Disyembre.


Agrekrekamo met dagiti mangmangged iti *2-week shifting schedule* nga ipatpatungpal ti LCMC manipud idi Pebrero 2003. “Narigat nga agpuyat iti dua a lawas,” reklamo dagiti mangmangged nga agrabaho iti *night shift* wenno rabii. Maap-apektaranen ti salun-at da gapu ditoy.

Inrupir da a rumbeng nga isubli iti dati a *weekly shifting schedule* no sadino a dagiti agrabaho iti rabii ket makainana kalpasan ti maysa a lawas. Adda tallo a *shift* ti panagrabaho para iti 24-oras nga operasyon ti minas.

Nayon pay, kinwestyon ti LEU ti wagas ti panangkuenta ti LCMC iti *withholding taxes* dagiti mangmangged ken proseso ti promosyon. Dagiti saan a nainkalintegan a patakaran ti LCMC

ket nayon a pammarigat kadagiti mangmangged nga agparpartuat ti kinabaknang a gamgamamen ti LCMC.

Kabayatan na, idi Pebrero 1 ket sinelebrar ti LEU ken dagiti organisasyon a sumupsuporta ditoy ti anibersaryo ti naimbaligian a welga da idi 2003 no sadino a nasurok 1,800 mangmangged ken empleyado ti nagwelga. Kuna ni Ninian Langagan, bise-presidente ti LEU, “Pinaneknekan tayo a babaen laeng iti nagkaykaysa ken kolektibo a panagtignay tayo a masalakniban dagiti demokratiko a karbengan ken pagsayaatan tayo kas mangmangged.”

Ti welga iti Lepanto ket inspirasyon ti adu a mangmangged ken unyon iti dangadang da para iti nainkalintegan a sueldo ken benepisyo, ken demokratiko a karbengan. 

Philex Mines, agul-ulbod a maluglugi


AGUL-ULBOD ti Philex Mines iti panagkuna na a maluglugin daytoy. Ti kinapudno, iti 45 tawen a panagminas ti Philex iti balitok ken gambang iti Padcal, Tuba, Benguet, dimmanonen iti nasurok P140 bilyon ti naganansya na. Bilyon-bilyon ti ak-akupen ti Philex manipud iti ling-et ken dara dagiti mangmangged. Murkat laeng ti ibaybayad na kadagiti minero. Awan pay ti pito a porsyento ti pas-trek ti Philex ti imbayad na kas buwis iti lokal a gobyerno ti Itogon, ngem ip-ipiten met ti nasyonal a gobyerno ti pannakaited daytoy.

Kagiddan ti panagpammarang a maluglugi, awan sarday ti panag-ikkat ti Philex kadagiti mangmangged idi 2003 tapno makatipid iti gastos ken makagamgam iti nayon a ganansya. Dimmanonen iti nasurok 300 mangmangged ti naawanan ti trabaho. Pinilit ti Philex nga agaplay ti dadduma a mangmangged iti *Early Retirement Plan (ERP)* tapno makaliklik ti Philex iti panangited iti *retirement benefits*. Imbes a kuentaen ti Philex ti ited na a benepisyo basar iti kinabayag ti serbisyo dagiti mangmangged, dua a bulan a sueldo laeng ti inted na. Nagpangta pay ti Philex a no saan a sumurot dagiti

mangmangged iti ERP, ikkaten na latta isuda ken lallalo nga awan ti maawat da uray sentimo.

Gapu iti saan a nainkalintegan a panagikkat kadagiti mangmangged, nangiyuli ti darum ti 26 mangmangged a naikkat laban iti Philex. Binukel da ti Tignayan dagiti Retrenched a Mangmangged ti Philex tapno ilaban ti karbengan da.

Saan met a pudno a malugi ti Philex kadagiti sumaruno a tawen gapu ta itatta pay laeng ket adda baro a *prospect* na nga umakaran no naibus nan ti balitok iti Pacdal. Nagrugin ti aplikasyon ti Philex para iti *Exploration Permit* iti Mexico, Camp 6, Tuba, Benguet. Ti kompanya nga Anglo-American ti mangpondo iti eksplorasyon inggana iti panagminas iti nasao a lugar. Adda 595 pamilya a maapektaran. Agdanag dagiti umili a maawan ti pangal-alaan da ti dandum no agrugin ti *drilling exploration* ti Philex.


Malaksid pay iti prospect iti Camp 6, adda nasurok 17,000 ektarya a naala ti Philex iti Itogon, Tuba, ken Tublay, Benguet ba-baen iti *Mineral Production Sharing Agreement* nga inaprobaran ti gobyerno. 




Dagdaga iti Itogon, ag-agawen ti Atok Gold Mines

Pito a barangay ti Itogon ti maapektaran iti plano ti Atok Gold Mines nga agpalawa ti minas. Sakup ti *mineral claims* ti Atok Mines dagiti barangay ti Ucab, Virac, Tuding, Gumatdang, Loakan, Ampucao, ken Poblacion.

Idi Nobyembre 25, 2003, rinugian ti Atok Mines ti demolisyon kadagiti balbalay iti Minac, Tuding. Adda 67 balay iti Minac a target, 12 kadagitoy ti indarum ti Atok Mines kas iskwater.

Nairut a kinondena dagiti umili ti Itogon daytoy a panag-gamgam ti Atok Mines. Kuna da, ti daga nga ag-agawen ti Atok Mines ket ancestral wenno nagtaudan a daga dagiti nainsigudan nga umili iti lugar. 


Aglawlaw ken pagbiagan iti Bucay, perdien ti Abra Mining

MADANDANAGAN dagiti umili ti Bucay, Abra a madadael ti aglaw-law ken pagbiagan da gapu iti panagserrek ti kompanya ti minas iti ili da. Inaprobaran itay nabiit ti Department of Environment and Natural Resources ti *Mineral Production Sharing Agreement* ti Abra Mining and Industrial Corporation tapno agminas ti *lime* iti Bucay iti 25 tawen. Sakupen ti kompanya ti 672 ektarya iti nasao a lugar. Dumanon iti nasurok 77 milyon a tonelada ti reserba a *lime* iti Bucay. Ti *lime* ket kadawyan a maus-usar iti panagaramid iti semento, landok, papel, sarming, kdp. 

P5M intaray dagiti iligal rekruter

NASUROK P5 milyon ti intaray dagiti iligal a rekruter manipud kadagiti biktima da iti Kordilyera idi 2003. Ngimmato iti 29% ti kaso ti iligal rekrutment iti Kordilyera idi 2003. Dimmanon iti 53 ti kaso idi 2003 kumpara iti 41 idi 2002. Idi laeng Enero 2004, addan 12 biktima ti iligal rekrutment.

Kadawyan a reklamo dagiti biktima ti kinaawan ti lisensya dagiti agrekrekrut a kompanya, panagsingir ti nakangatngato a *placement fees*, pannakapukaw ti papeles ken pannakaitaray ti kuarta nga imbayad da, ken panangilibak no ania ti pudno a galad ti trabaho idia abrod.

Gunggundawayan dagiti managgundaway ken oportunista nga iligal rekruter ti desperado a kasasaad dagiti marigrigat nga umili nga agnamnama a makaruk-at iti rigat ti biag no makapag-abrod. Napalalo ti panangbaybay-a ti gobyerno kadakuada numan pay isuda ti makaipaspastrek ti kadakkelan a gatad ti dolyar iti Pilipinas. 




Marijuana Operation ti PNP ken AFP


**Koresponsal
manipud iti Kalinga**

RUGRUGIAN manen ti Kalinga Provincial Police Office (KPPO) ken AFP ti *marijuana operation* nga Oplan Fortune manipud February 3, 2004 iti Tinglayan, Kalinga iti panangidaulo da SPO1 Dumalleg ken PO1 Alex Buyokan.


Babaen daytoy nga oplan, agpamarang ti KPPO nga ar-aramiden da ti rebbengen da a dalusan ti probinsya ti Kalinga kadagiti agmulmula ken aglalakso iti marijuana. Ti kinaagpayso na, kakumplot ti PNP ken AFP ti sindikato a CPLA iti negosyo a marijuana. Puoran da laeng ti sumagmamano a mula a marijuana ken ilako dan ti kaaduan.

Tapno dadaelen ti nagan ti NPA ken makaluban met ti krimen ti PNP ken AFP, ipabasol da iti NPA ti panagmula iti marijuana. 

Pribatisasyon ti baybay, mangpatpatay kadagiti mangngalap

PRIBATISASYON ti pagkalapan ti puon ti pannakatay ti lima ken pannakapukaw ti 25 a mangngalap iti baybay ti La Union ken Ilocos Sur idi Enero 23. Mapilpilitan dagiti mangngalap nga agpatengnga pay iti taaw gapu iti panagmonopolyo dagiti komprador burgesya ken ganggannaet (US, Japan, Taiwan) babaen kadagiti dadakkel a barko ken *trawlers* nga agkalap iti ikan ken gapu iti pribatisasyon dagiti sigud a pagkalkalapan dagiti bassit a mangngalap. Dagiti apektado a lugar ket Sto. Tomas, Aringay, Luna, Ba-
uang, ken Agoo, La Union. 

600 mangmangged ti DPWH naikkat

PANNAKAIKKAT iti trabaho ti pasarabo ti Department of Public Works and Highways (DPWH)-Cordillera kadagiti mangmangged idi baro a tawen. Nasurok 600 mangmangged ti naikkat idi Disyembre 31, 2003. Kaaduan kadagiti naikkat ket kaswal ken kontraktual nga empleyado ti DPWH iti nasurok sangapulo a tawen. Rason ni Antonio Purruganan, direktor ti DPWH-Cordillera, insardeng ti Department of Budget and Management ti panangited ti pondo para iti sueldo dagiti empleyado manipud pay idi Agosto 2003. Nakaro a rigat ti biag ti sagrapen manen dagiti pamilya dagitoy a mangmangged a naawanan ti trabaho. 







Edukasyon ti ubbing, nakakaasi

NAKADIDILLAW ti nababa a kalidad ti edukasyon dagiti estudyante aglalo itatta. Napaneknekan daytoy iti resulta ti maysa a surbey nga inaramid ti Department of Education - Benguet Division idi Nobyembre-Disyembre 2003. Uppat a porsyento laeng dagiti estudyante iti Grade I-III ti nalaing nga agbása.

Iti kabuklan nga 8,863 ubbing iti Grade I, 320 wenno 3.61% laeng ti makabása bayat a 96% ti marigatan wenno saan a makabasa. (*Kitaen ti tsart iti baba.*) Iti Grade III, 465 laeng iti kabuklan nga 8,515 ti makabasa bayat nga 8,050 ti marigatan wenno saan a makabása.

Kangrunaan a gapu ditoy ti panangipaidam ti gobyerno iti pondo ken serbisyo iti edukasyon. Nakabasbassit ti badyet para iti edukasyon. Gapu ditoy, kurang ti pasilidad, libro, ken uray dagiti titser. Isu a napalalo nga apektado ti kaammuan ken kabaelan dagiti ubbing aglalo kadagiti nasulinekan a lugar. 📌



Umab-abante ti rebolusyonaryo a trabaho iti salun-at

ITI NAPALABAS a dua a tawen, Inaregta nga immabante ti trabaho iti salun-at.

Narugian daytoy iti panna-kaiwayat ti Rehiyonal a Kompetensya iti Salun-at idi Oktubre 2002 iti maysa a sona a gerilya iti Kordilyera.

Inatendaran daytoy dagiti *medical officers (MO)* manipud iti nadumaduma a larangan a gerilya, pannakabagi ti Nasyonal a Kawanihan ti Partido iti Salun-at, ken ti Rehiyonal a Kawanihan ti Partido iti Salun-at.

Tinungtong da dagiti kangrunaan a problema iti salun-at iti rehiyon ken ti nakakaasi la unay a kasasaad ti salun-at ti umili gapu iti panangipaidam ti gobyerno iti pondo ken serbisyo.

Tinungtong da met ti kabuklan nga oryentasyon ti trabaho iti salun-at iti rehiyon agturong iti panangpadur-as iti rebolusyonaryo a sistema ti salun-at, ken panangipangato ti kabaelan ti rebolusyonaryo a puersa a mangtaming iti salun-at ti rebolusyonaryo a puersa ken umili.

Nagsasaruno dagiti naisa-yangkat a Batayan a Tukad ti Medikal Treyning. Nasurok 40 nga MO iti NPA ti nagtreyning idi 2002-2003.

Babaen kadagitoy a treyning, naikkan da ti kabaelan a mangagas kadagiti kadawyan a sakit kasta met kadagiti masugatan iti labanan. Narugian met a maipasaknap dagiti medikal treyning kadagiti umili. 📌

PIDBAK

•Abril-Hunyo 2003•

Nabagas amin ti linaon ti *Dangadang*, makapaawis amin dagiti artikulo ken dakkel ti maitulong na. Ngem adda latta maibilang ko a kamayatan kadagiti artikulo a nabasak, kas iti “Akintengnga a Puerisa Tumiptipon iti Rebolusyon” gapu ta rumbeng laeng a kaaduan kaniada ti maorganisa. Iti kasta ket nalaklaka a malabanan ti bulok a sistema ti gobyerno. Yamanek la unay dagiti staff ti *Dangadang* iti panangibutaktak yo ti kinaruker ti gobyerno iti panaglako da kadagiti saan nga umannatup nga agas. Dakkel a pribilehiyo kaniak daytoy kas mangsubsubaybay iti *Dangadang* gapu ta itattak laeng a naammuan nga adda gayam produkto a makasabidong kas iti BT corn. Manayonan pay koma ti pannakailadawan ti BT corn iti sumaruno nga isyu.


Mariel
Mannalon, Kalinga

Dakkel a pagyamanak dagiti staff ti *Dangadang* ta adu ti naadal ko ken napipintas amin ti linaon ti pagiwarnak tayo. Maibilangak met iti akintengnga a puerisa (maysaak a kagawad ti lupon), umannamongak a kasapulan a maorganisa dagitoy a grupo tapno malabanan da ti panaggundaway ti bulok a sistema ti gobyerno. Nayon a kaammuan ken tulong iti natakuatan a kinaluko ti gobyerno iti panangpalubos iti saan nga umno nga agas ken makasabidong a produkto a mais. Kayat ko a matalakay iti sumaruno, no adda pay dagiti saan a makatulong nga agas ken ania a klase a mais ti BT corn.

Doria
Mannalon, Kalinga

Napintas ken napateg kadatayo amin ti linaon ti *Dangadang* a nabasak. Manayonan ti kaammuan mi aglalo dagiti padak a marigatan nga agbasa. Saludsod ko laeng, ania ti langa ti BT corn? Ken ania ti maganab ti tao iti daytoy? Kayat ko a matalakay iti sumaruno nga isyu ti maipapan iti rehimen a GMA, Jose Pidal Account, ken ti kudeta a napasamak idi.

Magdangal
Mannalon, Kalinga



Ti langa ti BT corn ket kas iti maaw-awagan a yellow corn ngem dakdakkell daytoy. Agarup 12 pulgada ti kaatiddog na. Dagiti bukel na atiddog. Ti bin-i na ket aggapu kadagiti komprador kapitalista kas iti Monsanto nga agpakontrata ti panagmula kadagiti mannalon (contract growing). Iti panagmula, adu nga abono ken pestisidyo ti kasapulan. Iti kasta, dakkel ti maganansya dagiti komprador. Madama pay laeng a mapapauneg ti panagsukisok kadagiti dakes nga epekto ti BT corn. Adda payen ti BT a pagay.

Dagiti kiddaw yo a matalakay maipanggep kadagiti nasyonal ken internasyonal nga isyu ket rumrummuaren iti Ang Bayan isu a saanen a matalakay iti Dangadang.

Istap ti Dangadang

•Hulyo-Agosto 2003•

Idi nabasak ti isyu ti SOT, dakkel ti napidut ko nga adal. Naammuak nga iti uneg ti AFP ket adda ti kasla “arado” nga instrumento a maus-usar laeng kas salaknib dagiti amo da a nakatugaw iti turay.

DANGADANG

Ditoy ko met laeng a naadal dagiti nadumaduma ken bulok a taktika ken galad ti kabusor tapno buraken da ti rebolusyonaryo a tignayan ken no kasano da padpadasen a pagsinaen ti umili ken NPA. Kayarigan na ti “lames ken danum”, no kasano da nga paatyanan ti danum (isu ti umili) tapno kano matay ti lames (NPA). Kasapulan nga itultuloy tayo nga ibutaktak dagiti taktika ti kabusor iti nalawa a masa. Nayon a kaammuan met para kadagiti masa tapno mabantayan ken malabanan dagitoy. Nabasak amin dagiti artikulo. Kadagiti saan ko a maawatan, adda met dagiti kakadua ditoy a Pagsaludsodak. Kayat ko a matalakay iti sumaruno nga isyu ti *Dangadang* ti internasyonal a kasasaad.

Ka Wagsil
NPA-Mountain Province

.....
Ti internasyonal a kasasaad ket mabása iti Ang Bayan, Disyembre 26, 2003 nga isyu. Mabalin nga agpatulong kayo kadagiti kadre nga agipalawag dita ayan yo.

Istap ti Dangadang
.....

Kangrunaan iti amin, napapateg dagiti impormasyon ken adal manipud kadagiti artikulo kas iti SOT, CAFGU, seksyon medikal, damag ken adal. Manaynayonan koma dagiti ladawan. Dakkel a tulong dagiti drowing a mangawis iti panagbása ken mangpalaka iti panagawat. Kayat ko met a matalakay ti maipapan iti rekrutment kadagiti menor de edad ken kasasaad dagiti agtutubo.

“Kasapulan nga itultuloy tayo nga ibutaktak dagiti taktika ti kabusor iti nalawa a masa. Nayon a kaammuan met kadagiti masa tapno mabantayan ken malabanan dagitoy.”

Kakai
NPA-Mountain Province

.....
Kamayatan a nabasak ti Seksyon Medikal

maipanggep kadagiti maiparit wenno madi iti sakit nga ulser, ken herbal nga agas para ditoy. Naammuakon no apay a dagiti pangulo ti Pilipinas ket aso-aso a rehimen. Mabitinak a mangbása iti dadduma nga artikulo gapu ta ababa unay, kas iti pasamak ni Ka Yasmin ken dadduma pay a martir. Manayonan koma pay ti impormasyon maipanggep iti SOT. Matalakay koma ti nagpigsan dagiti kakadua ditoy ayan mi. Ad-adu pay koma ti maadal ko maipapan iti kultura.

Mangngek
Mannalon, Kalinga

• Setyembre-Oktubre 2003 •

Interesante ken mangted ti nayon nga adal amin a topiko gapu ta nabaknang iti datos ken nakabasar iti aktwal a praktika. Dagiti dadduma a datos ket naggapu pay kadagiti mismo a reaksyonaryo a gobyerno. Ti umili ti mangpaneknek kadagiti panagabuso ti militar kadagiti pangtao a karbengan.

Paaduen pay koma dagiti drowing. Uray ania nga artikulo ti matalakay iti sumaruno. Ti napateg ket mailawag ken maibutaktak ti kinabulok ti gobyerno, tapno mapapigsa pay ti panagabante ti rebolusyonaryo a tignayan.

Ka Witan
NPA-Kalinga

.....
Ti artikulo nga “Umir-irteng nga atake ti Rehimen a GMA” ket kongkreto a pakabayaan a bayat a mailumlumlom iti krisis ti agdama a sistema, kumarkaro metti ranggas nga iyab-ablat da iti umili. Makita met ditoy no siasino ti pudno a kabusor ti umili. Maipapan iti AFP, napauneg met no kasano kakaro ti panagkurakot ti AFP ken PNP iti buwis ti umili. Nayon pay a datos daytoy a mangpauneg iti propaganda tayo kadagiti CAFGU ditoy ayan mi. Makita ken marikna tayo met ti pagwadan a panagserbi ken kinabannuar dagiti kakadua a nagbuwis iti biag iti artikulo a “2 a Martir” ken ti naimpusuan a panagserbi da iti umili uray sadino man a lugar ti pakaipapanan da. Naawis met ti atensyon ken riknak kadagiti drawing.

***"Regular koma ti sangpet ti
Dangadang...Saan kayo a mauma a
mangted ti kaammuan kadakami a
mannalon babaen iti pagiwarnak tayo
ken dadduma pay a mabasbása."***

Kayat ko met a matalakay iti sumaruno no kasano ti kinakaro ti banggaan dagiti paksyon ti reaksyonaryo a gobyerno ken dagiti kapadasan ken adal iti panangipangato ti tukad dagiti organisasyon masa.

Ka Darren
NPA-Kalinga

• Nobyembre-Disyembre 2003 •

Ay-ayatek a kakadua iti *Dangadang*, nabasak amin a linaon ti Nobyembre-Disyembre nga isyu ti *Dangadang*. Kangrunaan iti amin ket agyamanak ta adu ti naadal ko a saan ko a naadal iti eskuelaan. Maguyugoy ti pusok nga agpinget a tumulong a mangpakaawat kadagiti padak a mannalon a saan pay a naikkan ti innadal. Nanayonan manen ti kaammuan babaen kadagiti artikulo a nabasak, kangrunaan iti benneg ti Seksyon Medikal maipapan ti panagusar iti herbal nga agas. Iti artikulo a "Martir: Ka Alfred," naammuak no sinno ti masingir iti biag ti maysa a kadua a nagsakripisyo para iti umili. Kayat ko nga umadu ti kaammuan iti panagusar kadagiti herbal nga agas ken kayat ko a matalakay ti kinaanus ti kakadua nga NPA.

Mangngek
Mannalon, Kalinga

Agyaman kami iti impaw-it mo a P50 kadakami. Dakkel ti maitulong daytoy aglalo ta umad-adu ti bilang ti Dangadang nga iwarwaras tayo ket ngumato manen ti presyo ti papel ken ink no Marso 2004.

Istap ti Dangadang



Kinompleto mi a binása ti Nobyembre-Disyembre nga isyu ti *Dangadang*. Nanayonan manen ti kaammuan mi iti panagusar iti herbal nga agas iti Seksyon Medikal. Mangipakita met a sangsangkamaysa ti umili ken hukbo iti "Agraryo a Rebolusyon iti Baryo Sampaga." Naadal mi ti natibker ken naurnos a panagtignay dagiti umili iti Mankayan iti artikulo a "Kumarkaro a Militarisation iti Mankayan, Konkontraen ti Umili!"

Regular koma ti sangpet ti *Dangadang* wenno binulan ti iskedyul na. Saan kayo a mauma a mangted ti kaammuan kadakami a mannalon babaen iti pagiwarnak tayo ken dadduma pay a mabasbása. Kayat mi nga OG a makaited ti adal.

Rosing
Mannalon, Kalinga

Yamanen mi ken maragsakan kami iti tuloy-tuloy a pidbak yo iti Dangadang. Dakkel ti tulong dagitoy tapno agtultuloy a mapadur-as ken mapapintas tayo pay ti pagiwarnak tayo. Uray agiinnadayo ti pagtigtignayan tayo ket mapaasideg tayo babaen kadagiti datos, damag, pidbak, ken kapadasan nga ibingbingay yo iti Dangadang. Kadagiti dadduma a singasing, namnamaen yo a masungbatan kadagiti sumarsaruno nga isyu ti Dangadang. Agbiag!

Istap ti Dangadang



Salidummay manipud iti **NPA-Mountain Province**

Daná tí marígrígat

Idi naipasngayak
Kasingin ko ti kinarigat
Ti narang-ay a panagbiag
Nagpatingga ti arapaap

Managayat a dadakkel ko
Sakripisyo da't napalalo
Ta kayat dak a maaddaan
Ti naraniag a masakbayan

Kayat dak man a patawidan
Iti adu a kinabaknang
Ngem ania ngay ti kabaelan
Mannalon da marigrigatan


Napalalo maapalanak
Dagiti ubbing a kapadak
Mapan da nga agiskuela
Agadal da ti ABaKaDa

Ngem uray no kaskasano
Adu met ti naadal ko
Ta inaldaw a sumrekak
Iti talon nga eskuelaak

Bayat a dumakdakkalak
In-inut a maaw-awatak
No apay a marigrigat
Ti umili nga agparpartuat

Ama, Ina a nadungngo
Ken dakayo a kakabsat ko
Agpakadaak kadakayo
Sumampaak iti armado

Itatta ket panawenen
Tapno intay arakupen
Ti armado a dangadang
Pandayen tay ti masakbayan.



IDI ENERO 6, 2004, IMMAI NI KA ROGER ROSAL DITOY KORDILYERA NGA INTERBYUEN TI MASMIDYA, KADUA NA NI KA FILIW, TAGAPAGSARITA TI CPDF.

KUNA TI GOBYERNO,
PANAGKIKIL KANO TI
SINGSINGIREN YO A PTC.

NATIKTIKAN TI KABUSOR TI
KINAADDA NI KA ROGER KET
NAGISAYANGKAT DA TI OPERASYON.

HALA! SERRAAN YO
AMIN A KALSADA! BIROKEN
YO NI KA ROGER!

SAAN, TI PTC KET BUWIS TI REBOLUSYONARYO
A GOBYERNO KADAGITI KANDIDATO ITI ELEKSYON.
MAUSAR DAYTOY PARA ITI PAGIMBAGAN
TI UMILI KEN REBOLUSYON.

IDIAY SAGADA, NAGKAIWARA
DAGITI ESPIYA TI PNP.

OOOPS!

AY! ESPIYA KA GAYAM!

OOOPS! BISTADO!

MANUEL
komiks

IDIAY SABANGAN,
HINARAS DAGITI PULIS
TI AGAWID A MASMIDYA.

AYAN NA NI KA ROGER?!

AWAN DITOY!

AGSUBLI KAN TO MANEN.

DIAK MAAWATAN!
KASANO A NAKALUSOT
NI KA ROGER?